

Interes grandi pa Alumni Association

di Universidad di Aruba

TA poco t'e momentonan unda no ta haci un diferencia si ta trata di un Minister di Husticia, un Rector di Universidad of un accountant, sino e base di nan estudio academico.

Y esaki tabata e caso recientemente unda pa prome biaha a trece hunto un porcentaje hopi grandi di e como mas cu 600 graduado di Universidad di Aruba.

Un encuentro cu tabatin como meta pa kishiki e sentidonan di comunidad, den e caso aki, e comunidad di ex alumnonan di Universidad di Aruba, p'asina percura cu e re-coneccion aki keda traduci den un institucion bibo, dinamico y impactante.

E Alumni Association di Universidad di Aruba.

E iniciativa di Universidad di Aruba, dirigi pa Oficina di Estudiante ('OSA') tabata bon ricibi. E prome potencial miembro di e institucion nobo, e propio Rector di Universidad di Aruba dr. Glenn Thode tabata e prome den rij.

Dr. Thode a gradua di Facultad di Derecho y a conoce hopi estudiante y graduado for di tempo cu e tabata studia y traha n'e instituto academico.

Pero e encuentro n'e Edificio Apex di Universidad di Aruba na LG Smith Boulevard a brinda Thode tambe e oportunidad pa conoce otronan cu tambe tin e academia Arubiano como nan Alma Mater, nan instituto unda nan a completa nan estudio superior.

Tabata mr. Luciano Milliard, kende a yama e grupo di como 50 graduado di Universidad di Aruba un bon bini.

Mr. Milliard a dirigi su mes n'ex studentenan cordando nan riba nan tempo n'e instituto. "Universidad di Aruba ya tin un tempo caba cu kier a tuma contacto cu boso pa sa con boso ta, kico Universidad por haci pa boso y kico boso lo por haci p'e instituto aki," mr. Milliard a comenta.

Despues di un video riba e balor di un Alumni Association pa un Universidad, Charisse Hoen Daly di OSA a mostra tambe e logo nobo di Universidad di Aruba, un version moderno di e Shoco, cu un curazon cuadra "cu ta representa e imagen, e marca di Universidad di Aruba. Boso ta e imagen di Universidad di Aruba y e balornan cu e ta representa."

Y ehempel tin di graduadonan di Universidad di Aruba cu ta haci impacto den comunidad di Aruba, manera un Edward Erasmus kende a yuda haci e movecion di Ora di Mundo na Aruba uno cu tin su luga den sociedad. Y Erasmus lo mester inspira e generacion actual di studentenan aspira na contribucionnan asina tambe. "Nos exito continuo, di Universidad di Aruba, ta depende di boso, graduadonan," Milliard a agrega.

CONOCE OTRO

E cantidad di graduadonan cu a responde n'e invitacion p'e prome encuentro tabata implica tambe cu algun no conoce otro. Y aki, prome Presidente di e Consejo di Estudiante y awor graduado su mes, mr. Suzy Kock a haya e honor pa 'kibra e ijs' y laga tur presente conoce otro mihor. El a bin cu un ehersicio unda a parti esnan presente den grupo.

Cada grupo a apunta un vocero, pero tur mester a contesta 4 pregunta personal cu pintura. Y e lider di grupo despues mester a haci un presentacion di contesta di dos miembro di su grupo, miembronan cu kizas e mes a sera conoci cu n'e momento ey. E



ehersicio aki a saca hopi contesta spontaneo, ademas di a saca afo ken ademas di inteligencia tin talento pa pintura tambe.

Segun Rector dr. Glenn Thode, ta a base di e pinturanan aki cu por a conoce mas di e personalidad di esnan cu manera hopi, a scoge Universidad di Aruba pa nan estudio superior y awor ta den funcionnan clave tanto na Aruba como den exterior. Un personalidad cu ta cla pa sigui cu e coneccion, bin cu critica pa laga Universidad di Aruba hisa su nivel mas ainda, y sirbi como un culpa mas p'e institucion.

"E ta un forma di Universidad di Aruba pa saca e mihor di nos comunidad di graduadonan, e comunidad cu e instituto mes a crea."

Desde cu Thode a cuminsa studia na 1989, a inicia idea y esfuersonan pa lanta un Consejo di Estudiante, pero esey a tuma su tempo.

Un graduado, un ex alumno Suzy Kock, hunto cu un grupo di estudiante dedica, a logra esaki. Y di e mesun forma ta spera cu e for di esnan cu a atende e encuentro lo lanta e Alumni Association, cu kier ta parti di un comunidad critico, cu kier comparti exito.

Pasobra "como estudiante, bo ta parti di un comunidad vibrante. Pero ora gradua ta perde contacto cu otronan."

Y sigur ora cu graduadonan logra funcionnan halto, manera un Minister, of hasta un Rector, e adagio 'solitario na e top' ta bira un realidad. Pero cu un Alumni Association, e por sirbi como posibilidad pa crea algo nobo, coneccionnan

fuerte na interes di tur.

Kizas e persona cu mas a ilustra e balor di e encuentro di graduadonan, organiza pa Universidad di Aruba, ta Decano di Facultad di Turismo, John Wardlaw.

Wardlaw, kende tin un otro Alma Mater, a haci Aruba su cas y Universidad di Aruba su pasion, a bisa cu e tabata contento di a mira hopi hende conoci.

"Pero mi no tabata sa cu tur ta graduadonan di Universidad di Aruba. Esaki ta un grupo bendicida."

Un Alumni Association lo sirbi graduadonan cu mas coneccion pa nan crece mas den nan carera y bida, pero tambe lo yuda studentenan actual y futuro.

Pensa riba kico mester haci pa lanta e asociacion, pasobra e ta un necesidad," Wardlaw a conclui.

Universidad di Aruba a tuma e prome paso pa haci un yamada na su graduadonan pa mira si tin interes pa lanta e Alumni Association di Universidad di Aruba.

Awor ta keda n'e propio ex studentenan pa lanta e asociacion y determina su rumbo. Si mester huzga n'e forma con varios estudiante a responde n'e prome invitacion y e combersacionnan cu a inicia, no mester tin duda cu e Alumni Association di Universidad di Aruba lo bira un realidad pronto.

Pa informacion por yama Office of Student Affairs (OSA) na 588-9946.